



Moderamen
GBKP

Ibadah Keluarga

Selasa, 14 Juli 2020



Moderamen_GBKP



gbkp.or.id



Moderamen GBKP

1. Rende: “I bas Jesus Kita Ersenina” (iulih-ulihi 2-3 kali)

I bas Jesus, kita ersenina, i bas Jesus, kita ersenina
I bas Jesus kita ersenina, gundari seh rasa lalap
I bas Jesus, kita ersenina

2. Ertoto (Ibabai sekalak anggota jabu)

3. Renungen: Johanes 14:27

Mawen-mawen erkiteken perbeben ras kiniseran geluh, lanai kal kita ngasup ngataken bujur man Dibata. Sebab enggo megati kita siakap si liahna. Ban litna perbeben, kita siakap si meserana kegeluhenta. Tempa-tempa bagi kalak si enggo ndatken ukumen i bas Dibata nari. Padahal iajuk kal kita gelahna ngasup ngataken bujur man Dibata i bas kerina situasi (Bnd. Pil. 4:4). Tentu enda labo hal si menukah. Sebab kalak si ngasup ngataken bujur e, arus kalak si enggo ngasup ngaloken kerina situasi si jadi i bas ia. Arus jadi kalak si ngasup rukur mehuli (berfikir positif). Si labo rusur menyalahken situasi ntahpe kalak si deban. Justru ia ngasup jadi kalak si ngidah hal-hal si mehuli i bas situasi si la mehuli bas kegeluhenna. I bas si salah e pe, ngasup ia ngidah pengajaren si mehuli si arus ilakokenna bas kegeluhenna.

Bagem pengajaren Kristus man kalak si tek man baNa. Aminna pe kam Kutadingken niNa Kristus, tetaplah malem atendu. Ngantusi kata enda labo menukah. Sebab semalna adi lit kalak nadingken kita maka sitading e labo atena malem. Apaika si lawes e kalak si mehuli perbahanenna. Tentu lit nge morah atena adi lawes ia. Tapi i bas Kristus la bage. Justru nina Jesus malemlah atendu. Ertina maka iajuk Jesus kita ngidah hal si mehuli i bas geluhenta. Jesus nadingken kita labo erkiteken nembeh atena kita. Labo ka erkiteken kisasat ia ndeher ras kita. Tapi ia lawes nikapken ingan man manusia. Gelahna kenca reh ka ia pagi manusia banci nggeluh ersada ras Kristus. Janah kiniersadan e pagi lanai erkeri-kerin. Tapi kiniersadan si kekal. Em sabapna maka labo perlu aru ateNdu nina man banta. Sebab labo itadingkenNa kita melumang bas doni enda. Labo itadingkenna manusia sekalak dengen lalit gegeh i bas ia. Tapi tetap nge iberekenNa penampat man manusia.



Endam wujud kemalemen ate si itawarken Kristus man banta manusia. Lanai kemalemen ate rikutken kai si isikapken doni enda. Adi gelgel, maka malem ateta adina seh sura-suranta. Ntahpe malem ateta sebab situasi geluhta pe mehuli kerina. Tapi persinget i bas renungenta berngi enda, ituriken maka kemalemen ate si ipadanken Dibata e, labo bali ras kemalemen ate si itawarken doni enda. Kemalemen ate i bas Dibata, aminna pe situasi la bagi ukurta, tetap kita ngasup ngataken bujur man Dibata. La menukah kita merawa, la menukah kita ernembeh ate dengen lanai menukah pe kita ercian ate man kalak si deban. Sabap sipala-palai nge rukur bagi cara rukur Kristus. Sibabai nge dirinta gelahna banci rukur kerna hal-hal si mehuli saja. Adina si latih dirinta rukur kerna hal-hal simehuli, tentu pasti nge kita pe reh tenengna pusuhna. Kalak si teneng pusuhna pasti malem kal atena. Adi teneng pusuh ras malem ateta, enggo pasti sehat ka pe kulanta. Jadi kerina lit kawitenna. Emaka erjuanglah ndatken kemalemen ate, sabap kalak si malem atena pasti igejapkenna kiniersadanna ras Kristus. Amin.

4. Rende: KEE 350:1,2 “Kelengi Kebenaren”

Kelengi kebenaran, pedauhlah si jahat
Pakeken Kata Tuhan, tahan rasa lalap
Nggeluhlah alu bujur peteruk ukur kin
Dalanken kebenaran maka ukur teneng

Reff: Erjaga-jagalah reh me wari Tuhan
Ersikap-sikaplah, pake Kata Tuhan

Darami si mehuli, pedauh min si ilat
Megermet bas keg'luhen, make pedah Tuhan
Lakokenlah si adil, i bas kegeluhen
Bage me pedah Tuhan, tetap si dalanken

Reff: Erjaga-jagalah reh me wari Tuhan
Ersikap-sikaplah, pake Kata Tuhan

5. Doa Syafaat ras Pertoton Tuhan (Ibabai Bapa)

Notoken pergumulen bangsa ras negara i bas situasi si genduari.
Notoken pelayanen gereja. Notoken kegeluhen ras pendahin
perpulungen.

